

Komediju našu ovu  
Završavan na Ćokovu  
Rič je starog autora  
Se jedanput svršit mora

Ja vas molin ljudi naši  
Za rastanak kot sportaši  
Ovo moru svatit dica  
Oproštajnaj utakmica

Otel bin reć dvi tri riči  
To na kraju i priliči  
Reć događaj kij noviji  
Ča je, ča nij va Šentenciji

Sa uvodon da ne duljin  
Valje krećen va Poduljin  
Jako me interesira  
Jel pronašla ovce Mira

Znatiželjan ja san jako  
Znan da Miri nij to lahko  
Ja sumnju od sebe tiran  
Pa oću da buden miran

Jedan čovik valjdaj rekal  
Daj te ovce Ljubo spekal  
Dabogda na ognji sidel  
On to blago nij ni videl

Sul te ovce stare bile  
Morda bi se i janjile  
Od lopovaj ovo grdo  
Njemu meso to nij tvrdo

Na kraju bin rekal sada  
Mira se još uvik nada  
Mislin da se to reć smije  
Da to blago već ne blije

To su ljudi znaci loši  
Već se krađu i kokoši  
Neznan stel već ovo čuli  
Krađaj va Sveton Mikuli

Ivanka tu perad ima  
Triba jaja i to štima  
Nima za krast druge stoke  
Lopovu su dobre koke

Ivanka od muki plaće  
Niš više ne kokodaće  
Istinaj to ljudi živa  
Daj bar peteh pa da piva

Se ča vidi lopov zdipi  
Ne boji se tiče gripi  
Se ča bi mu čovik rekal  
Dabogda od gripi krepal

Jutrić Zoran, Tićak Želja  
Dva su stara prijatelja  
Kad popiju ti su kadri  
Osvanut na kafi v Zadri

Va Vrbi pili za stolon  
Na put krenuli renolon  
Šofer Željko dosta miran  
A renol neregistriran

Neka se i ovo čuje  
V Senju zgaju stup od struje  
Sad je škuro kot i v riti  
Više totu niš ne sviti

Novi dan je, prva ura  
A orkanska dere bura  
Doli ispod Velebita  
Misleli su smak je svita

Na pol puta Zoran veli  
Još nikogar nismo sreli  
Kokova si ti budala  
Mor zaprtaj magistrala

Do Zadra stižu u zoru  
Prvo javit će se Čoru  
Tablu Zadar zagrlili  
Na mobitel se snimili

Popili su jednu ljutu  
Nazad te po iston putu  
Za pol ure va renolu  
Naleteli na patrolu

Tićaku se glava heri  
A Jutrić se samo ceri  
Gljeda pandur neveruje  
Sul ovi dva još z «Oluje»

Nimaju ni dokumenta  
Ni va žepi jednog centa  
Žandari ne puste dalje  
Tićak Draška zove valje

Još uvik je tukla bura  
Kad finilaj avantura  
Spi Zoran, do njega Želja  
A Draško ih doma pelja

Nij to bilo tako davno  
Mjesto radnje selo Rvno  
Nepogoda jedna mala  
Zrušila sej Peki štala

Tragedija nij jedina  
Poklopilaj stojadina  
Vlasnik veli nije šteta  
Sad iman kabrioleta

TAMBUR

Prije neg se ovo fini  
Gremo malo do Kričini  
Ovo vele daj istina  
Za Ivana Šimičina

Kada žena mu se javi  
Ive naglas joj objavi  
Tu poruku čudnu niku  
Si su čuli va hodniku

Bil je bolan nij to šala  
I dospel je do špitala  
Tamoj ležal sada znamo  
Ante Begić isto tamo

Hodi ženo brzo v Riku  
Zač san pal va nepriliku  
Neprilike ma ne maće  
Pobiglo mij se va gaće

Na prvo bin mesto stavil  
To daj Ante Begić pravil  
Daj to bilo na hodniku  
Opisal je celu sliku

Nosi čiste gaće simo  
Da to brzo prominimo  
Ljudi naglas čuju njega  
Šundral san se sasin sega

Da počmemo ovu temu  
Gre Šimičin Ivan k njemu  
Daj mi Ante mor smo ljudi  
Mobitel mi tvoj posudi

Želju bin još imal velu  
Prnesi mi šuljkih zdelu  
Daj prnesi ovo meni  
Šuljki dobro posireni

Stvar je hitna kot za glavu  
Moran doma zazvat Pavu  
Skoro mu i suza krenu  
Hitno mora nazvat ženu

Ante ljuden objašnjava  
Toj Bribirska hrana prava  
Specijalitet iz Bribira  
Kocke testa s puno sira

Misli Ante ča je da je  
Mobitel mu valje daje  
Ive brzo broji bira  
Nervozan je nima mira

Da se Ive ne najadi  
Kada me sastane kadi  
Zdrav mi Ive i čvrst budi  
Šentencija je za ljudi

TAMBUR

V Riki ako niste znali  
Si smo bili papagali  
Sto i trejset nas je bilo  
Fanj sej toga i popilo

I gajba sej načinila  
Va njoj su nan dica bila  
Zatu gajbu spred paradi  
Ja medalju dajen Dadi

On i Stanko su se bili  
Bome fanjski namučili  
Činjenicaj nas dotukla  
V Rikij valje guma pukla

Gljeda Dado problem novi  
I valje se posla lovi  
Brz je moran dodat ovo  
Dvi minuti, sej gotovo

Da gaj mogla vidit Stanka  
Kad dočepa on sej šanka  
Jasnaj bila va nemoći  
Nij prestal pit do pol noći

Još je jedno društvo malo  
Novo jutro dočekalo  
Predvode ga toj milina  
Andrea i Nikolina

I kad su va velon cugu  
One misle na Udrugu  
Nagrade su dvi prnesle  
Skidan kapu vami simi.

Ča ste tu na ovoj zimi  
I stariji i vi mlaji  
Ča volite običaji

Udruga vas jako voli  
Za uslugu jednu moli  
Ne veliku nego malu  
Napunite kletu salu

Ovo letoj slabo bilo  
Na prsti nas sej brojilo  
Kletu bit će bolja slika  
Kad važgemo «IZDAJNIKA»

Poli nas je opet moda  
Da ti dicu nosi roda  
Vrimena su jako čudna  
Žena rodi a nij trudna

Neka novog naraštaja  
Da ne bude priči kraja  
Neka uče dica mala  
Još Hrvatska nij propala

Sad palite «IZDAJNIKA»  
Kraj njegovu spomenika  
Neka zgori do popela  
Sramotaj bil našeg sela

TAMBUR